

目
日
之
函
入

景
德
傳
燈
錄

土岐文庫

文庫17

W17

3

10

15

20

25

30

35

景德傳外紀卷五

宋神宗元祐元年

第三十三卷

一

西

官

河

海

有

八

文庫 17
W17
3

景德傳燈錄卷第五

宋沙門道原纂

第三十三祖慧能大師

第三十三祖慧能大師法嗣四十三人

一十九人見錄
一十人旁出

西印度崛多三藏

韶州法海禪師

吉州志誠禪師

廬山曉了禪師

河北智隍禪師

洪州法達禪師

壽州智通禪師

江西志徹禪師

信州智常禪師

廣州志道禪師



昭和六十年二月一日
寄贈
吉原氏

010185142763

廣州法性寺印宗和尚

吉州青原山行思禪師

南嶽懷讓禪師

溫州永嘉玄覺禪師

司空山本淨禪師

婺州玄策禪師

曹谿令韜禪師

西京光宅寺慧忠禪師

西京荷澤寺神會禪師

韶州祇陀禪師

撫州淨安禪師

嵩山尋禪師

羅浮山定真禪師

南嶽堅固禪師

制空山道進禪師

善快禪師

韶山緣素禪師

宗一禪師

南嶽梵行禪師

會稽秦望山善現禪師

西京咸空禪師

并州自在禪師

光州法淨禪師

峽山泰祥禪師

廣州吳頭陀

清涼山辯才禪師

智本禪師

道英禪師

廣州清苑法真禪師

玄楷禪師

曇璿禪師

韶州刺史韋據

義興孫菩薩

二二二二十四人無機緣語何不錄

廣州清苑法真禪師
玄楷禪師
韶州刺史韋據
義興孫菩薩
二二二二十四人無機緣語何不錄

第三十三祖慧能大師者俗姓盧氏其先范陽人父行瑫武德中左宦于南海之新州遂占籍焉三歲喪父其母守志鞠養及長家尤貧窶師樵采以給一日負薪至市中聞客讀金剛經悚然問其客曰此何法也得於何人客曰此名金剛經得於黃梅忍大師師遽告其母以爲法尋師之意直抵韶州遇高行士劉志略結爲交友尼無盡藏者卽志略之姑也常讀涅槃經師暫聽之卽爲解說其義尼遂執卷問字師曰字卽不識義卽請問尼曰字尚不識曷能會義師曰諸佛妙理非關文字尼驚異之告鄉里耆艾云能是

有道之人宜請供養於是居人競來瞻禮近有寶林古寺舊地衆議營緝俾師居之四衆霧集俄成寶坊師一日忽自念曰我求大法豈可中道而止明日遂行至昌樂縣西山石室間遇智遠禪師師遂請益遠曰觀子神姿爽拔殆非常人吾聞西域菩提達磨傳心印于黃梅汝當往彼衆決師辭去直造黃梅之東禪卽唐咸亨二年也忍大師一見默而識之後傳衣法令隱于懷集四會之間至儀鳳元年丙子正月八日屆南海遇印宗法師於法性寺講涅槃經師寓止廊廡間暮夜風颺剝檐聞一僧對論一云幡動一云

風動往復原答未曾契理師曰可容俗流輒預高論
否直以風幡非動動自心耳印宗竊聆此語竦然異
之翌日邀師入室徵風幡之義師具以理告印宗不
覺起立云行者定非常人師爲是誰師更無所隱直
敘得法因由於是印宗執弟子之禮請受禪要乃告
四衆曰印宗具足凡夫今遇肉身菩薩卽指座下盧
居士云卽此是也因請出所傳信衣悉令瞻禮至正
月十五日會諸名德爲之剃髮二月八日就法性寺
智光律師受滿分戒其戒壇卽宋朝求那跋陀三藏
之所置也三藏記云後當有肉身菩薩在此壇受戒

又梁末真諦三藏於壇之側手植一菩提樹謂衆曰
卻後一百二十年有大開士於此樹下演無上乘度
無量衆師具戒已於此樹下開東山法門宛如宿契
明年二月八日忽謂衆曰吾不願此居要歸舊隱時
印宗與緇白千餘人送師歸寶林寺韶州刺史韋據
請於大梵寺轉妙法輪并受無相心地戒門人紀錄
目爲壇經盛行於世然返曹谿雨大法雨學者不下
千數中宗神龍元年降詔云朕請安秀二師宮中供
養萬機之暇每究一乘二師竝推讓云南方有能禪
師密受忍大師衣法可就彼問今遣內侍薛簡馳詔

迎請願師慈念速赴上京師上表辭疾願終林麓薛
簡曰京城禪德皆云欲得會道必須坐禪習定若不
因禪定得而解脫者未之有也未審師所說法如何
師曰道由心悟豈在坐也經云若見如來若坐若臥
是行邪道何故無所從來亦無所去若無生滅是如
來清淨禪諸法空寂是如來清淨坐究竟無證豈況
坐耶簡曰弟子之迴主上必問願和尚慈悲指示心
要師曰道無明暗明暗是代謝之義明明無盡亦是
有盡簡曰明喻智慧暗況煩惱修道之人儻不以智
慧照破煩惱無始生死憑何出離師曰若以智慧照

煩惱者此是二乘小見羊鹿等機上智大根悉不如
是簡曰如何是大乘見解師曰明與無明其性無二
無二之性即是實性實性者處凡愚而不滅在賢聖
而不增住煩惱而不亂居禪定而不寂不斷不常不
來不去不在中間及其內外不生不滅性相如如常
住不遷名之曰道簡曰師說不生不滅何異外道師
曰外道所說不生不滅者將滅止生以生顯滅滅猶
不滅生說無生我說不生不滅者本自無生今亦無
滅所以不同外道汝若欲知心要但一切善惡都莫
思量自然得入清淨心體湛然常寂妙用恒沙簡蒙

指教豁然大悟禮辭歸闕表奏師語有詔謝師并賜
摩衲袈裟絹五百匹寶鉢一口十二月十九日敕改
古寶林爲中興寺三年十一月十八日又敕韶州刺
史重加崇飾賜額爲法泉寺師新州舊居爲國恩寺
一日師謂衆曰諸善知識汝等各各淨心聽吾說法
汝等諸人自心是佛更莫狐疑外無一物而得建立
皆是本心生萬種法故經云心生種種法生心滅種
種法滅若欲成就種智須達一相三昧一行三昧若
於一切處而不住相彼相中不生憎愛亦無取捨不
念利益成壞等事安閑恬靜虛融澹泊此名一相三

昧若於一切處行住坐臥純一直心不動道場真成
淨土名一行三昧若人具二三昧如地有種能含藏
長養成就其實一相一行亦復如是我今說法猶如
時雨溥潤大地汝等佛性譬諸種子遇茲霑洽悉得
發生承吾旨者決獲菩提依吾行者定證妙果先天
元年告諸徒衆曰吾忝受忍大師衣法今爲汝等說
法不付其衣蓋汝等信根淳熟決定不疑堪任大事
聽吾偈曰

心地含諸種
普雨悉皆生
頓悟華情已
菩提果自成

師說獨已復曰其法無二其心亦然其道清淨亦無諸相汝等慎勿觀淨及空其心此心本淨無可取捨各自努力隨緣好去師說法利生經四十載其年七月六日命弟子往新州國恩寺建報恩塔仍令倍工又有蜀僧名方辯來謁師云善捏塑師正色曰試塑看方辯不領旨乃塑師真可高七寸曲盡其妙師觀之曰汝善塑性不善佛性爾以衣物僧禮謝而去先天二年七月一日謂門人曰吾欲歸新州汝速理舟楫時大眾哀慕乞師且住師曰諸佛出現猶示涅槃有來必去理亦常然吾此形骸歸必有所眾曰師從

此去早晚卻迴師曰葉落歸根來時無口又問師之法眼何人傳受師曰有道者得無心者通又問後莫有難否曰吾滅後五六年當有一人來取吾首聽吾記曰頭上養親口裏須餐遇滿之難楊柳爲官又云吾去七十年有一菩薩從東方來一在家一出家同時興化建立吾宗締緝伽藍昌隆法嗣言訖往新州國恩寺沐浴訖跏趺而化異香襲人白虹屬地卽其年八月三日也時韶新兩郡各修靈塔道俗莫決所之兩郡刺史共焚香祝云香煙引處卽師之欲歸焉時鑪香騰涌直貫霄路以十一月十三日入塔壽七

十六前韶州刺史韋據撰碑門人憶念取晉之記遂
先以鐵葉漆布固護師頸塔中有達磨所傳信衣屈胸布也緇木綿華心中宗賜摩訶寶鉢方辯塑真織成後人以碧絹爲裏道真等至塔侍者尸之開元十年壬戌八月三日夜
半忽聞塔中如拽鐵索聲僧衆驚起見一孝子從塔
中走出尋見師頸有傷具以賊事聞於州縣縣令楊
侃刺史柳無忝得牒切加擒捉五日於石角村捕得
賊人送韶州鞠問云姓張名淨滿汝州梁縣人於洪
州開元寺受新羅僧金大悲錢二十千令取六祖大
師首歸海東供養柳守聞狀未卽加刑乃躬至曹谿

問師上足令韜曰如何處斷韜曰若以國法論理須
誅夷但以佛教慈悲冤親平等況彼求欲供養罪可
恕矣柳守嘉歎曰始知佛門廣大遂赦之爾後甚有
名賢贊述及檀施珍異文繁不錄上元元年肅宗遣使就請師衣鉢歸內
供養至永泰元年五月五日代宗夢六祖大師請衣
鉢七日敕刺史楊城云朕夢感能禪師請傳法袈裟
卻歸曹谿今遣鎮國大將軍劉崇景頂戴而送朕謂
之國寶卿可於本寺如法安置專令僧衆親承宗旨
者嚴加守護勿令遺墜後或爲人偷竊皆不遠而獲
如是者數四憲宗謚大鑒禪師塔曰元和靈照皇宋

開寶初王師平南海劉氏殘兵作梗師之塔廟輒爲煨燼而真身爲守塔僧保護一無所損尋有制興修功未竟會太宗卽位留心禪門頗增壯麗焉大師自唐先天二年癸丑入滅至今景德元年甲辰歲凡二百九十二年矣得法者除印宗等三十三人各化一方標爲正嗣其外藏名匿迹者不可勝紀今於諸家傳記中略錄十人謂之旁出

西域塚多三藏者天竺人也東遊韶陽見六祖於言下契悟後遊五臺至定襄縣歷村見一僧結庵而坐三藏問曰汝孤坐奚爲曰觀靜三藏曰觀者何人靜

者何物其僧作禮問曰此理何如三藏曰汝何不自觀自靜彼僧茫然莫知其對三藏曰汝出誰門耶曰神秀大師三藏曰我西域異道最下根者不墮此見兀然空坐於道何益其僧卻問三藏所師何人三藏曰我師六祖汝何不速往曹谿決其真妄其僧卽捨庵往參六祖具陳前事六祖垂誨與三藏符合其僧信入三藏後不知所終

韶州法海禪師者曲江人也初見六祖問曰卽心卽佛願垂指喻祖曰前念不生卽心後念不滅卽佛成一切相卽心離一切相卽佛吾若具說窮劫不盡聽

吾偈曰

卽心名慧

卽佛乃定

定慧等持

意中清淨

悟此法門

由汝習性

用本無生

雙修是正

法海信受以偈贊曰

卽心元是佛

不悟而自屈

我知定慧因

雙修離諸物

壇經云門人法海者卽禪師是也

吉州志誠禪師者吉州太和人也少於荆南當陽山玉泉寺奉事神秀禪師後因兩宗盛化秀之徒衆往往譏南宗曰能大師不識一字有何所長秀曰他得

無師之智深悟上乘吾不如也且吾師五祖親付衣法豈徒然哉吾所恨不能遠去親近虛受國恩汝等諸人無滯於此可往曹谿質疑他日迴復還爲吾說師聞此語禮辭至韶陽隨衆參請不言來處時六祖告衆曰今有盜法之人潛在此會師出禮拜具陳其事祖曰汝師若爲示衆對曰常指誨大衆令住心觀靜長坐不臥祖曰住心觀靜是病非禪長坐拘身於理何益聽吾偈曰

生來坐不臥

死去臥不坐

元是臭骨頭

何爲立功過

師曰未審大師以何法誨人祖曰吾若言有法與人即為誑汝但且隨方解縛假名三昧聽吾偈曰

一切無心自性戒

一切無礙自性慧

不增不退自金剛

身去身來本三昧

師聞偈悔謝即誓依歸乃呈一偈曰

五蘊幻身

幻何究竟

迴趣真如

法還不淨

祖然之尋迴玉泉

匾檐山曉了禪師者傳記不載唯北宗門人忽雷澄撰塔碑盛行于世略曰師住匾檐山法號曉了六祖

之嫡嗣也師得無心之心了無相之相無相者森羅

眩目無心者分別熾然絕一言一響響莫可傳傳之

行矣言莫可窮窮之非矣師自得無無之無不無於

無也吾今以有有之有不有於有也不有之有去來

非增不無之無涅槃非滅嗚呼師住世兮曹谿明師

寂滅兮法舟傾師譚無說兮寰宇盈師示迷徒兮了

義乘匾檐山色垂玆色空谷猶留曉了名

河北智隱禪師者始參五祖法席雖嘗咨決而循乎

漸行後往河北結庵長坐積二十餘載不見情客及

遇六祖門人策禪師遊歷于彼激以勤求法要師遂

捨庵往參六祖祖愍其遠來便垂開挾師於言下豁
然契悟前二十年所得心都無影響其夜河北檀越
士庶忽聞空中有聲曰墮禪師今日得道也後迴河
北開化四眾

洪州法達禪師者洪州豐城人也七歲出家誦法華
經進具之後來禮祖師頭不至地祖呵曰禮不投地
何如不禮汝心中必有一物蘊習何事耶師曰念法
華經已及三千部祖曰汝若念至萬部得其經意不
以爲勝則與吾偕行汝今負此事業都不知迴聽吾
偈曰

禮本抗慢幢頭奚不至地有我罪卽生
二功福無比

祖又曰汝名什麼對曰名法達祖曰汝名法達何曾
達法復說偈曰

汝今名法達勤誦未休歇空誦但循聲
明心號菩薩汝今有緣故吾今爲汝說
但信佛無言蓮華從口發

師聞偈悔過曰而今而後當謙恭一切惟願和尚太
慈略說經中義理祖曰汝念此經以何爲宗師曰學
人愚鈍從來但依文誦念豈知宗趣祖曰汝試爲吾

念一徧吾當為汝解說師即高聲念經至方便品祖
曰止此經元來以因緣出世為宗縱說多種譬喻亦
無越於此何者因緣唯一大事一大事即佛知見也
汝慎勿錯解經意見他道開示悟入自是佛之知見
我輩無分若作此解乃是誦經毀佛也彼既是佛已
具知見何用更開汝今當信佛知見者只汝自心更
無別體蓋為一切眾生自蔽光明貪愛塵境外緣內
擾甘受驅馳便勞他從三昧起種種苦口勸令寢息
莫向外求與佛無二故云開佛知見汝但勞勞執念
謂為功課者何異羣牛愛尾也師曰若然者但得解

義不勞誦經耶祖曰經有何過豈障汝念只為迷悟
在人損益由汝聽吾偈曰

心迷法華轉 心悟轉法華 誦久不明已
與義作他家 無念念即正 有念念成邪
有無俱不計 長御白牛車

師聞偈再啓曰經云諸大聲聞乃至菩薩皆盡思度
量尚不能測於佛智今令凡夫但悟自心便名佛之
知見自非上根未免疑謫又經說三車大牛之車與
白牛車如何區別願和尚再垂宣說祖曰經意分明
汝自迷背諸三乘人不能測佛智者患在度量也饒

伊盡思共推轉加懸遠佛本爲凡夫說不爲佛說此
理若不肯信者從他退席殊不知坐卻白牛車更於
門外覓三車況經文明向汝道無二亦無三汝何不
省三車是假爲昔時故一乘是實爲今時故只教汝
去假歸實歸實之後實亦無名應知所有珍財盡屬
於汝由汝受用更不作父想亦不作子想亦無用想
是名持法華經從劫至劫手不釋卷從晝至夜無不
念時也師旣蒙啓發踊躍歡喜以偈贊曰

經誦三千部 曹谿一句云 未明出世旨
寧歇累生狂 羊鹿牛權設 初中後善揚

誰知火宅內 元是法華王

祖曰汝今後方可名爲念經僧也師從此領玄旨亦
不較誦持

壽州智通禪師者壽州安豐人也初看楞伽經約千
餘遍而不會三身四智禮師求解其義祖曰三身者
清淨法身汝之性也圓滿報身汝之智也千百億化
身汝之行也若離本性別說三身卽名有身無智若
悟三身無有自性卽名四智菩提聽吾偈曰

自性具三身 發明成四智 不離見聞緣
超然登佛地 吾今爲汝說 諦信永無迷

莫學馳求者 終日說菩提

師曰四智之義可得聞乎祖曰既會三身便明四智何更問耶若離三身別譚四智此名有智無身也即此有智還成無智復偈曰

大圓鏡智性清淨 平等性智心無病

妙觀察智見非功 成所作智同圓鏡

五八六七果因轉 但用名言無實性

若於轉處不留情 繁興永處那伽定

轉識為智者教中云轉前五識為成所作智轉第六識為妙觀察智轉第七識為平等性智轉第八識為大圓鏡智雖六七因中轉五八果上轉但轉其名而不轉其體也

師禮謝以偈贊曰

三身元我體 四智本心明 身智融無礙

應物任隨形 起修皆妄動 守住匪真精

妙旨因師曉 終二汗染名

江西志徹禪師者江西人也姓張氏名行昌少任俠自南北分化二宗主雖二彼我而徒侶競起愛憎時北宗門人自立秀師為第六祖而忌能大師傳衣為天下所聞然祖是菩薩預知其事即置金十兩於方丈時行昌受北宗門人之囑懷刃入祖室將欲加害祖舒頸而就行昌揮刃者三都無所損祖曰正劒不

邪邪劍不正只負汝金不負汝命行昌驚仆久而方
甦求哀悔過卽願出家祖遂與金云汝且去恐徒衆
翻害於汝汝可他日易形而來吾當攝受行昌稟旨
宵遁終投僧出家具戒精進一日憶祖之言遠來禮
覲祖曰吾久念於汝汝來何晚曰昨蒙和尚捨罪今
雖出家苦行終難報於深恩其唯傳法度生乎弟子
嘗覽涅槃經未曉常無常義乞和尚慈悲略爲宣說
祖曰無常者卽佛性也有常者卽善惡一切諸法分
別心也曰和尚所說大違經文也祖曰吾傳佛心卽
安敢違於佛經曰經說佛性是常和尚卻言無常善

惡諸法乃至菩提心皆是無常和尚卻言是常此卽
相違令學人轉加疑惑祖曰涅槃經吾昔者聽尼無
盡藏讀誦一遍便爲講說無一字一義不合經文乃
至爲汝終無一說曰學人識量淺昧願和尚委曲開
示祖曰汝知否佛性若常更說什麼善惡諸法乃至
窮劫無有一人發菩提心者故吾說無常正是佛說
真常之道也又一切諸法若無常者卽物物皆有自
性容受生死而真常性有不徧之處故吾說常者正
是佛說真無常義也佛比爲凡夫外道執於邪常諸
二乘人於常計無常共成八倒故於涅槃了義教中

破彼偏見而顯說真常真我真淨汝今依言荷義以斷滅無常及確定死常而錯解佛之圓妙最後微言縱覽千徧有何所益行昌忽如醉醒乃說偈曰

固守無常心 佛演有常性 不知方便者
猶春池執藥 我今不施功 佛性而見前
非師相授與 我亦無所得

祖曰汝今徹也宜名志徹師禮謝而去

信州智常禪師者本州貴谿人也髫年出家志求見性一日參六祖祖問汝從何來欲求何事師曰學人近往洪州建昌縣白峯山禮大通和尚蒙示見性成

佛之義未決狐疑至吉州遇人指迷令投謁和尚伏願垂慈攝受祖曰彼有何言句汝試舉似於吾與汝證明師曰初到彼三月未蒙開示以為法切故於中夜獨入方丈禮拜哀請大通乃曰汝見虛空否對曰見彼曰汝見虛空有相貌否對曰虛空無形有何相貌彼曰汝之本性猶如虛空返觀自性了無一物可見是名正見無一物可知是名真知無有青黃長短但見本源清淨覺體圓明即名見性成佛亦名極樂世界亦名如來知見學人雖聞此說猶未決了乞和尚誨示令無疑滯祖曰彼師所說猶存見知故令汝

未了吾今示汝一偈曰

不見一法存無見

大似浮雲遮日面

不知一法守空知

還如太虛生閃電

此之知見瞥然興

錯認何曾解方便

汝當一念自知非

自己靈光常顯見

師聞偈已心意豁然乃述一偈曰

無端起知解

著相求菩提

情存一念悟

寧越昔時迷

自性覺源體

隨照枉遷流

不入祖師室

茫然趣兩頭

廣州志道禪師者南海人也參六祖曰學人初自出

家覽涅槃經僅十餘載未明大意願和尚垂誨祖曰

汝何處未了對曰諸行無常是生滅法生滅滅已寂

滅爲樂於此疑惑祖曰汝作麼生疑對曰一切衆生

皆有一身謂色身法身也色身無常有生有滅法身

有常無知無覺經云生滅滅已寂滅爲樂者不審是

何身寂滅何身受樂若色身者色身滅時四大分散

全是苦苦不可言樂若法身寂滅卽同草木瓦石誰

當受樂又法性是生滅之體五蘊是生滅之用一體

五用生滅是常生則從體起用滅則攝用歸體若聽

更生卽有情之類不斷不滅若不聽更生卽永歸寂

滅同於無情之物如是則一切諸法被涅槃之所禁
伏尚不得生何樂之有祖曰汝是釋子何習外道斷
常邪見而議最上乘法據汝所解卽色身外別有法
身離生滅求於寂滅又推涅槃常樂言有身受者斯
乃執吝生死耽著世樂汝今當知佛爲一切迷人認
五蘊和合爲自體相分別一切法爲外塵相好生惡
死念念遷流不知夢幻虛假枉受輪迴以常樂涅槃
翻爲苦相終日馳求佛愍此故乃示涅槃真樂剎那
無有生相剎那無有滅相更無生滅可滅是則寂滅
見前當見前之時亦無見前之量乃謂常樂此樂無

有受者亦無不受者豈有一體五用之名何況更言
涅槃禁伏諸法令永不生斯乃謗佛毀法聽吾偈曰
無上大涅槃 圓明常寂照 凡愚謂之死
外道執爲斷 諸求一乘人 目以爲無作
盡屬情所計 六十二見本 妄立虛假名
何爲真實義 唯有過量人 通達無取捨
以知五蘊法 及以蘊中我 外現衆色象
一一音聲相 平等如夢幻 不起凡聖見
不作涅槃解 二邊三際斷 常應諸根用
而不起用想 分別一切法 不起分別想

劫火燒海底

風鼓山相擊

真常寂滅樂

涅槃相如是

吾今彊言說

令汝捨邪見

汝勿隨言解

許汝知少分

師聞偈踊躍作禮而退

廣州法性寺印宗和尚者吳郡人也姓印氏從師出家精涅槃大部唐咸亨元年抵京師敕居大敬愛寺固辭往蘄春謁忍大師後於廣州法性寺講涅槃經遇六祖能大師始悟玄理以能為傳法師又採自梁至唐諸方達者之言著心要集盛行于世先天二年二月二十一日終于會稽山妙喜寺壽八十有七會

稽王師乾立塔銘焉

吉州青原山行思禪師本州安城人也姓劉氏幼歲出家每羣居論道師唯默然後聞曹谿法席乃往參禮問曰當何所務即不落階級祖曰汝曾作什麼來師曰聖諦亦不為祖曰落何階級曰聖諦尚不為何階級之有祖深器之會下學徒雖眾師居首焉亦猶二祖不言少林謂之得髓矣一日祖謂師曰從上衣法雙行師資遞授衣以表信法乃印心吾今得入何患不信吾受衣以來遭此多難況乎後代爭競必多衣即留鎮山門汝當分化一方無令斷絕師既得法

住吉州青原山靜居寺六祖將示滅有沙彌希遷即

嶺石頭和尚問曰和尚百年後希遷未審當依附何人祖

曰尋思去及祖順世遷每於靜處端坐寂若忘生第

一座問曰汝師已逝空坐奚爲遷曰我稟遺誡故尋

思爾第一座曰汝有師兄行思和尚今住吉州汝因

緣在彼師言甚直汝自迷耳遷聞語便禮拜祖直

詣靜居師問曰子何方而來遷曰曹谿來師曰得

什麼來曰未到曹谿亦不失師曰怎麼用去曹谿作

什麼曰若不到曹谿爭知不失遷又問曰曹谿大師

還識和尚否師曰汝今識吾否師曰識又爭能識得

師曰衆角雖多一麟足矣遷又問和尚自離曹谿什

麼時至此間師曰我卻不知汝早晚離曹谿曰希遷

不從曹谿來師曰我亦知汝來處也曰和尚幸是大

人且莫造次他日師復問遷汝什麼處來曰曹谿來

師乃舉拂子曰曹谿還有這箇麼曰非但曹谿西天

亦無師曰子莫曾到西天否曰若到即有也師曰未

在更道曰和尚也須道取一半莫全靠學人師曰不

辭向汝道恐已後無人承當師令希遷持書與南嶽

讓和尚曰汝達書了速迴吾有箇銚斧子與汝住山

遷至彼未呈書便問不慕諸聖不重已靈時如何讓

日子問太高生何不向下問遷曰寧可永劫受沉淪
不從諸聖求解脫讓便休遷迴至靜居師問日子去
未久送書達否遷曰信亦不通書亦不達師曰作麼
生遷舉前話了卻云發時蒙和尚許箇錫斧子便請
取師垂一足遷禮拜尋辭往南嶽玄沙云大小石頭和尚被讓師推倒
至入起荷澤神會來參師問曰什麼處來會曰曹谿
師曰曹谿意旨如何會振身而已師曰猶帶瓦礫在
曰和尚此間莫有真金與入否師曰設有與汝向什
麼處著玄沙云果然雲居錫云只如僧問如何是佛
法大意師曰廬陵米作麼價師既付法石頭惠開元

二十八年庚辰十二月十三日陞堂告衆跏趺而逝
僖宗諡弘濟禪師歸真之塔

南嶽懷讓禪師者姓杜氏金州人也年十五往荊州
玉泉寺依弘景律師出家受具之後習毗尼藏一日
自歎曰夫出家者爲無爲法天上人間無有勝處時
同學坦然知師志高邁勸師同謁嵩山安和尚安啓
發之乃直詣曹谿參六祖祖問什麼處來曰嵩山來
祖曰什麼物恁麼來曰說似一物即不中祖曰還可
修證否曰修證即不無汙染即不得祖曰只此不汙
染諸佛之所護念汝既如是吾亦如是西天般若多

羅識汝足下出一馬駒踢殺天下人並在汝心不須
速說師豁然契會執侍左右一十五載唐先天二年
始往衡嶽居般若寺開元中有沙門道一即馬祖也住
傳法院常日坐禪師知是法器往問曰太德坐禪圖
什麼十曰圖作佛師乃取一磚於彼庵前石上磨十
曰磨磚作麼師曰磨作鏡十曰磨磚豈得成鏡耶師
曰磨磚既不成鏡坐禪豈得作佛耶十曰如何即是
師曰如牛駕車車不行打車即是打牛十即是一無對
師又曰汝爲學坐禪爲學坐佛若學坐禪禪非坐臥
苦學坐佛佛非定相於無住法不應取捨汝若坐佛

卽是殺佛若執坐相非達其理一聞示誨如飲醍醐
禮拜問曰如何用心卽合無相三昧師曰汝學心地
法門如下種子我說法要譬彼天澤汝緣合故當見
其道又問曰道非色相云何能見師曰心地法眼能
見乎道無相三昧亦復然矣十曰有成壞否師曰若
以成壞聚散而見道者非見道也聽吾偈曰

心地含諸種 遇澤悉皆萌 三昧華無相
何壞復何成

一蒙開悟心意超然侍奉十秋日益玄奧師入室弟
子總有六人師各印可云汝等六人同證吾身各契

一路一人得吾眉善威儀常一人得吾眼善顧盼達
 一人得吾耳善聽理坦一人得吾鼻善知氣神一人
 得吾舌善譚說峻一人得吾心善古今道又曰一切
 法皆從心生心無所生法無能住若達心地所作無
 礙非遇上根且慎辭哉有一大德問如鏡鑄像像成
 後鏡明向什麼處去師曰如大德為童子時相貌何
 在法眼別云阿那箇曰只如像成後為什麼不鑑照
 師曰雖然不鑑照護他一點不得後馬大師闡化於
 江西師問眾曰道一為眾說法否眾曰已為眾說法
 師曰總未見人持箇消息來眾無對師遣一僧去云

待伊上堂時但問作麼生伊道底言語記將來僧去
 一如師旨迴謂師曰馬師云自從胡亂後三十年不
 曾聞鹽醬師然之天寶三年八月十一日圓寂於衡
 嶽勅諡大慧禪師最勝輪之塔

溫州永嘉玄覺禪師者永嘉人也姓戴氏壯歲出家
 徧探三藏精天台止觀圓妙法門於四威儀中常冥
 禪觀後因左谿朗祖師激勵與東陽策禪師同詣曹
 谿初到振錫攜瓶繞祖三市卓然而立祖曰夫沙門
 者具三千威儀八萬細行大德自何方而來生大我
 慢師曰生死事大無常迅速祖曰何不體取無生中

無速乎曰體即無生了本無速祖曰如是如是于時
大衆無不愕然師方具威儀參禮須臾告辭祖曰返
太速乎師曰本自非動豈有速耶祖曰誰知非動曰
仁者自生分別祖曰汝甚得無生之意曰無生豈有
意耶祖曰無意誰當分別曰分別亦非意祖歎曰善
哉善哉少留一宿時謂一宿覺矣策公乃留師翌日
下山迴溫江學者輻湊號真覺大師著證道歌一首
及禪宗悟修圓旨自淺之深慶州刺史魏靖緝而序
之成十篇目爲永嘉集並盛行于世
慕道志儀第一

夫欲修道先須立志及事師儀則彰乎軌則故標第
一明慕道儀式

戒憍奢意第二

初雖立志修道善識軌儀若三業憍奢妄心擾動何
能得定故次第一明戒憍奢意也

淨修三業第三

前戒憍奢略標綱要今子細檢責令過不生故次第
三明淨修三業戒乎身口意也

奢摩他頌第四

已檢責身口令麤過不生次須入門修道漸次不出

定慧五種起心六種料簡故次第四明奢摩他頌也

毗婆舍那頌第五

非戒不禪非禪不慧上既修定定久慧明故次第五明

毗婆舍那頌也

優卑又頌第六
偏修於定定久則沉偏學於慧慧多心動故次第六

明優卑又頌等於定慧今不沉動使定慧均等捨於

二邊

三乘漸次第七
定慧既均則寂而常照三觀一心何疑不遣何照不

圓自解雖明悲他未悟悟有深淺故次第七明三乘
漸次也

事理不二第八

三乘悟理理無不窮窮理在事理事即理故次第八
明事理不二即事而真用祛倒見也

勸友人書第九

事理既融內心自瑩復悲遠學虛擲寸陰故次第九
明勸友人書也

發願文第十

勸友人雖是悲他專心在二情猶未替故次第十明

發願文誓度一切

景德傳燈錄卷五

復次觀心十門初則言其法爾次則出其觀體三則語其相應四則警其上慢五則誠其疎怠六則重出觀體七則明其是非八則簡其證旨九則觸途成觀十則妙契玄源

第一言法爾者夫心性虛通動靜之源莫二真如絕慮緣計之念非殊惑見紛馳窮之則唯一寂靈源不狀鑒之則以千差千差不同法眼之名自立一寂非異慧眼之號斯存理量雙銷佛眼之功圓著是以三諦一境法身之理常清三智一心般若之明常照境

智冥合解脫之應隨機非縱非橫圓伊之道玄會故知三德妙性宛爾無乖一心深廣難思何出要而非路是以卽心爲道者可謂尋流而得源

第二出其觀體者只知一念卽空不空非空非不空第三語其相應者心與空相應則譏毀讚譽何憂何喜身與空相應則刀割香塗何苦何樂依報與空相應則施與劫奪何得何失心與空不空相應則愛見都忘慈悲普救身與空不空相應則內同枯木外覩威儀依報與空不空相應則永絕貪求資財給濟心與空不空非空非不空相應則實相初明開佛知見

身與空不空非空非不空相應則一塵入正受諸塵
三昧起依報與空不空非空非不空相應則香臺寶
閣嚴土化生

第四警其上慢者若不爾者則未相應也

第五誡其疎怠者然渡海應上船非船何以能渡修
心必須入觀非觀何以明心心尚未明相應何日思
之勿自恃也

第六重出觀體者只知一念即空不空非有非無不
知即念即空不空非非有非非無

第七明其是非者心不是有心不是無心不非有心

不非無是有是無即墮是非有非無即墮非如是只
是是非之非未是非是非非之是今以雙非破兩是
是破非是猶是非又以雙非破兩非非破非非即是
是如是只是非是非非之是未是不非不非不是
不不是是非之惑綿微難見神清慮靜細而研之

第八簡其詮旨者然而至理無言假文言以明其旨
旨宗非觀藉修觀以會其宗若旨之未明則言之未
的若宗之未會則觀之未深深觀乃會其宗的言必
明其旨旨宗既其明會言觀何得復存耶

第九觸途成觀者夫再演言辭重標觀體欲明宗旨

無異言觀有逐方移方移則言理無差無差則觀皆
不異不異之旨即理無差之理即宗旨一而二名言
觀明其弄亂耳

第十妙契玄源者夫悟心之士寧執觀而迷旨達教
之人豈滯言而惑理理明則言語道斷何言之能議
旨會則心行處滅何觀之能思心言不能思議者可
謂妙契寰中矣

師先天二年十月十七日安坐示滅十一月十三日
塔于西山之陽勅謚無相大師塔曰淨光皇朝淳化
中太宗皇帝詔本州重修龕塔

一山本淨禪師者絳州人也姓張氏幼歲披緇于
曹谿之室受記肄司空山無相寺唐天寶三年玄宗
遣中使楊光庭入山采常春藤因造丈室禮問曰弟
子慕道斯久願和尚慈悲略垂開示師曰天下禪宗
碩學咸會京師天使歸朝足可咨決貧道隈山傍水
無所用心光庭泣拜師曰休禮貧道天使爲求佛耶
問道耶曰弟子智識昏昧未審佛之與道其義云何
師曰若欲求佛即心是佛若欲會道無心是道曰云
何即心是佛師曰佛因心悟心以佛彰若悟無心佛
亦不有曰云何無心是道師曰道本無心無心名道

若了無心無心卽道光庭作禮信受既迴闕庭具以
山中所遇奏聞卽敕光庭詔師十月十三日到京
敕住白蓮亭越明年正月十五日召兩街各僧領學
赴內道場與師闡揚佛理時有遠禪師者抗聲謂師
曰今對聖上校量宗旨應須直問直答不假繁辭只
如禪師所見以何爲道師答曰無心是道遠曰道因
心有何得言無心是道師曰道本無名因心名道心
名若有道不虛然窮心旣無道憑何立二俱虛妄總
是假名遠曰禪師見有身心是道已否師曰山僧身
心本來是道曰適言無心是道今又言身心本來是

道豈不相違師曰無心是道心泯道無心道一如故
言無心是道身心本來是道道亦本是身心身心本
旣是空道亦窮源無有曰觀禪師形質甚小卻會此
理師曰大德只見山僧相不見山僧無相見相者是
大德所見經云凡所有相皆是虛妄若見諸相非相
卽悟其道若以相爲實窮劫不能悟道曰今請禪師
於道上說於無相師曰淨名經云四大無主身亦無
我無我所見與道相應大德若以四大有主是我若
有我見窮劫不可會道也遠公聞語失色逡巡避席
師有偈曰

四大無主復如水

遇曲逢直無彼此

淨穢兩處不生心

壅決何曾有一意

觸境但似水無心

在世縱橫有何事

復云一大如是四大亦然若明四大無主即悟無心
若了無心自然契道又有志明禪師者問曰若言無
心是道无礫無心亦應是道又云身心本來是道四
生十類皆有身心亦應是道師曰太德若作見聞覺
知之解與道懸殊即是求見聞覺知之者非是求道
之人經云無眼耳鼻舌身意六根尚無見聞覺知憑
何而立窮本不有何處存心焉得不同草木瓦礫志

明杜口而退師又有偈曰

見聞覺知無障礙

聲香味觸常三昧

如鳥空中只麼飛

無取無捨無憎愛

若會應處本無心

始得名爲觀自在

又有真禪師者問云道既無心佛有心否佛之與道
是一是二師曰不一不異曰佛度衆生爲有心故道
不度人爲無心故一度一不度何得無二師曰若言
佛度衆生道無度者此是大德妄生一見如山僧即
不然佛是虛名道亦妄立二俱不實總是假名一假
之中何分二問曰佛之與道從是假名當立名時是

誰爲立若有立者何得言無師曰佛之與道因心而立推窮立心心亦是無心既是無心悟一俱不實如夢幻卽悟本空彊立佛道二名此是一乘人見解師乃說無修無作偈曰

見道方修道 不見復何修
虛空何所修 徧觀修道者
撥火覓浮漚 但看弄傀儡
線斷一時休

又有法空禪師者問曰佛之與道俱是假名十二分教亦應不實何以從前尊宿皆言修道師曰太德錯會經意道本無修大德彊修道本無作太德彊作道

本無事彊生多事道本無知於中彊知如此見解與道相違從前尊宿不應如是自是大德不會請思之師又有偈曰

道體本無修 不修自合道
若起修道心 此人不會道
棄卻一真性 卻入鬧浩浩
忽逢修道人 第一莫向道

又有安禪師者問曰道既假名佛云安立十二分教亦是接物度生一切是妄以何爲真師曰爲有妄故將真對妄推窮妄性本空真亦何曾有故故知真妄總是假名一事對治都無實體窮其根本一切皆空

日既言一切是妄妄亦同真真妄無殊復是何物師
日若言何物何物亦妄經云無相似無比況言語道
斷如鳥飛空安公慙伏不知所措師又有偈曰

推真真無相 窮妄妄無形 返觀推窮心
知心亦假名 會道亦如此 到頭亦只寧

又有達性禪師者問曰禪是至妙至微真妄雙泯佛
道兩亡修行性空名相不實世界如幻一切假名作
此解時不可斷絕衆生善惡二根師曰善惡二根皆
因心有窮心若有根亦非虛推心既無根因何立經
云善不善法從心化生善惡業緣本無有實師又有

偈曰

善既從心生 惡豈離心有 善惡是外緣
於心實不有 捨惡送何處 取善令誰守
傷嗟二見人 攀緣兩頭走 若悟本無心
始悔從前咎

又有近臣問曰此身從何而來百年之後復歸何處
師曰如人夢時從何而來睡覺時從何而去曰夢時
不可言無既覺不可言有雖有有無來往無所師曰
貧道此身亦如其夢又有偈曰

視生如在夢 夢裏實是閒 忽覺萬事休

還同睡時悟

智者會悟夢

迷人信夢鬧

會夢如兩般

一悟無別悟

富貴與貧賤

更亦無別路

上元二年五月五日歸寂敕謚大曉禪師

婺州玄策禪師者婺州金華人也出家遊方屆于河朔有智隱禪師者曾謁黃梅五祖庵居二十年自謂正受師知隱所得未真往問曰汝坐於此作麼隱曰入定師曰汝言入定有心耶無心耶若有心者一切蠢動之類皆應得定若無心者一切草木之流亦合得定曰我正入定時則不見有有無之心師曰自不

見有有無之心卽是常定何有出入若有出入則非大定隱無悟良久問師嗣誰師曰我師曹谿六祖曰六祖以何爲禪定師曰我師云夫妙湛圓寂體用如如五陰本空六塵非有不出不入不定不亂禪性無住離住禪寂禪性無生離生禪想心如虛空亦無虛空之量隱聞此說未息疑情遂造于曹谿請決疑翳而祖意與師冥符隱始開悟師後卻歸金華大開法席

曹谿今韓禮師者吉州人也姓張氏依六祖出家未嘗離左右祖歸寂遂爲衣塔王唐開元四年玄宗聆

其德風詔令赴闕師辭疾不起上元元年肅宗遣使
取傳法衣入內供養仍敕師隨衣入朝師亦以疾辭
終于本山壽九十五敕謚大曉禪師

西京光宅寺慧忠國師者越州諸暨人也姓冉氏自
受心印居南陽白崖山黨子谷四十餘祀不下山門
道行聞于帝里唐肅宗上元二年敕中使孫朝進齋
詔徵赴京待以師禮初居于福寺西禪院及代宗臨
御復迎止光宅精藍十有六載隨機說法時有西天
大耳三藏到京云得他心慧眼帝敕令與國師試驗
三藏纔見師便禮拜立于右邊師問曰汝得他心通

耶對曰不敢師曰汝道老僧即今在什麼處曰和尚
是一國之師何得卻去西川看競渡師再問汝道老
僧即今在什麼處曰和尚是一國之師何得卻在天
津橋上看弄猢猻師第三問語亦同前三藏良久罔
知去處師叱曰這野狐精他心通在什麼處三藏無
對僧問仰山曰長耳三藏第三度爲什麼不見國師
仰山曰日前兩度是涉境心後入自受用三昧所以
不見又有僧舉前語問玄沙玄沙曰汝道前兩度還
見麼玄覺云前兩度若見後來爲什麼不見且道利
害在什麼處僧問趙州曰長耳三藏第三度不見國
師未審國師在什麼處趙州云在三藏鼻孔裏僧問
玄沙既在鼻孔裏爲什麼
不見玄沙云只爲太近
一日喚侍者侍者應諾如
是三召皆應諾師曰將謂吾孤負汝卻是汝孤負吾

僧問玄沙國師喚侍者意作麼生玄沙云卻是侍者會雲居錫云且道侍者會不會若道會國師又道汝孤負吾苦道不會玄沙又道卻是侍者會且作麼生商量玄覺徵問僧什麼是侍者會處僧云若不會爭解恁麼應玄覺云汝必會在又云若於這裏商量得去便見玄沙僧問法眼國師喚侍者意作麼生法眼云且去別時來雲居錫云法眼恁麼道為復明國師意不明國師意僧問趙州國師喚侍者意作麼生趙州云如人暗裏書字南泉到參師問什麼處來對曰字雖不成文彩已彰江西來師曰還將得馬師真來否曰只這是師曰背後底南泉便休長慶稜云大似不知保福展云幾不扶北月後只如南泉休去麻谷到參繞禪牀三市於師為當扶面前扶背後前振錫而立師曰既如是何用更見貧道麻谷又振錫師叱曰這野狐精出去師每示眾云禪宗學者應

遵佛語一乘了義契自心源不了義者互不相許如師子身蟲夫為人師者若涉名利別開異端則自他何益如世太匠斤斧不傷其手香象所負非驢能堪有僧問若為得成佛去師曰佛與眾生一時放卻當處解脫問作麼生得相應去師云善惡不思自見佛性問若為得證法身師曰越毗盧之境界曰清淨法身作麼生得師曰不著佛求耳問阿那箇是佛師曰卽心是佛曰心有煩惱否師曰煩惱性自離曰豈不斷耶師曰斷煩惱者卽名二乘煩惱不生名大涅槃問坐禪看靜此復若為師曰不垢不淨寧用起心而看

淨和又問禪師見十方虛空是法身否師曰以想心取之是顛倒見問卽心是佛可更修萬行否師曰諸聖皆具一嚴豈撥無因果耶又曰我今答汝窮劫不盡言多去道遠矣所以道說法有所得斯則野干鳴說法無所得是名師子吼南陽張漬行者問伏承和尚道無情說法某甲未體其事乞和尚垂示師曰汝若問無情說法解他無情方得聞我說法汝但聞取無情說法去漬曰只約如今有情方便之中如何是無情因緣師曰如今一切動用之中但凡聖兩流都無少分起滅便是出識不屬有無熾然見覺只聞無

其情識繫執所以六祖云六根對境分別非識有僧到參禮師問蘊何事業曰講金剛經師曰最初兩字是什麼曰如是師曰是什麼僧無對有人問如何是解脫師曰諸法不相到當處解脫曰恁麼卽斷去也師曰向汝道諸法不相到斷什麼師見僧來以手作圓相相中書日字僧無對師問本淨禪師汝已後見奇特言語如何淨曰無一念心愛師曰是汝屋裏事肅宗問師得何法師曰陛下見空中一片雲麼帝曰見師曰釘釘著懸掛著又問如何是十身調御師乃起立曰還會麼曰不會師曰與老僧過淨瓶來又曰

如何是無諍三昧師曰檀越蹋毗盧頂上行曰此意如何師曰莫認自己清淨法身又問師師都不視之曰朕是大唐天子師何以殊不顧視師曰還見虛空麼曰見師曰他還眨目視陛下否魚軍容問師住白崖山十二時中如何修道師喚童子來摩頂曰惺惺惺惺歷歷直然歷歷已後莫受人謾師與紫璘供奉論議既陞座供奉曰請師立義某甲破師曰立義竟供奉曰是什麼義師曰果然不見非公境界便下座一日師問紫璘供奉佛是什麼義曰是覺義師曰佛曾迷否曰不曾迷師曰用覺作麼供奉無對

又問如何是實相師曰把將虛底來曰虛底不可得師曰虛底尚不可得問實相作麼僧問如何是佛法大意師曰文殊堂裏萬菩薩曰學人不會師曰大悲千手眼耽源問百年後有人問極則事作麼生師曰幸自可憐生須要箇護身符子作麼師以化緣將畢涅槃時至乃辭代宗代宗曰師滅度後弟子將何所記師曰告檀越造取一所無縫塔曰就師請取塔樣師良久曰會麼曰不會師曰貧道去後有侍者應門卻知此事大曆十年十二月九日右脅長往弟子奉靈儀於黨子谷建塔教誡大證禪師代宗後詔應真

入內舉問前語真良久曰聖上會麼曰不會真述偈曰

湘之南 澗之北

中有黃金克一國

無影樹下合同船

瑠璃殿上無知識

應真後住耽源山

西京荷澤神會禪師者襄陽人也姓高氏年十四爲沙彌謁六祖祖曰知識遠來大艱辛將本來否若有本則合識主試說看師曰以無住爲本見卽是主祖曰這沙彌爭合取次語便以杖打師於杖下思惟曰大善知識歷劫難逢今旣得遇豈惜身命自此給侍

他日祖告衆曰吾有一物無頭無尾無名無字無背無面諸人還識否師乃出曰是諸佛之本源神會之佛性祖曰向汝道無名無字汝便喚本源佛性師禮拜而退師尋往西京受戒唐景龍中卻歸曹谿祖滅後二十年間曹谿宗旨沉廢於荆吳高嶽漸門盛行於秦洛乃入京天寶四年方定兩宗南能頓宗北秀漸教乃著顯宗記盛行于世一日鄉信至報云親云師入堂白槌曰父母俱喪請大衆念摩訶般若衆纔集師便打槌曰勞煩大衆師於上元元年五月十三日中夜奄然而化俗壽七十五二年遷塔於洛京龍門敕於塔

所置寶應寺大曆五年賜號真宗般若傳法之堂七
年又賜般若大師之塔
有僧舉臥輪禪師偈云

臥輪有伎倆 能斷百思想 對境心不起
菩提日日長

六祖大師聞之曰此偈未明心地若依而行之是加
繫縛因示一偈曰

慧能沒伎倆 不斷百思想 對境心數起
菩提作麼長

此二偈諸方多舉故附於卷末臥輪者非名即住處也

景德傳燈錄卷第五

校記

第九紙第四行元北藏誤作元從南藏改正

音釋

堀渠勿切匾匾悲典切葵亡遇切珀他刀切宦胡慣切
也寔無羽切麓盧谷切捏捏倪結切塑蘇故切
穢矩涉切鞠居六切戒古咸切煨煨烏同切燼燼徐刃切
聲莫交切甦孫租切確克角切髻子田切童童切
耽都含切鈿陀骨切跣羊進切偎烏回切傀傀切偶偶切
液之精切盼匹視切胤羊進切猥烏回切傀傀切偶偶切
猥猥切傀傀切蠢尺尹切漬符分切眄側合切傀傀切偶偶切

丹陽居士賀學禮施貲刻此
景德傳燈錄卷五
計字乙萬四千四百三十箇該銀七兩五錢
安城沙門可震對吳門徐普書上元徐存禮刻
萬曆乙巳孟冬月徑山寂照庵識

景德傳燈錄卷第六

宋沙門道原纂

南嶽懷讓禪師法嗣

第一世九人見錄一人

江西道一禪師姓馬時謂馬祖

南嶽常浩禪師

坦然禪師

揚州大明寺嚴峻禪師

玄晨禪師

已上八人無機緣語句不錄

第二世三十七人馬祖法嗣一十四人見錄

越州大珠慧海禪師

洪州百丈山惟政禪師

智達禪師
潮州神照禪師
新羅國本如禪師
東霧山法空禪師

洪州泐潭法會禪師

池州杉山智堅禪師

洪州泐潭惟建禪師

澧州茗谿道行禪師

撫州石顰慧藏禪師

唐州紫玉山道通禪師

江西北蘭讓禪師

洛京佛光如滿禪師

袁州南源道明禪師

忻州鄠村自滿禪師

朗州中邑洪恩禪師

洪州百丈山懷海禪師

禪門規式附

鎬英禪師

王姥山倚然禪師

崇泰禪師

華州伏棲寺策禪師

澧州松滋塔智聰禪師

唐州雲秀山神鑒禪師

杭州智藏禪師

揚州棲靈寺智通禪師

京兆懷韶禪師

虔州法藏禪師

常州明幹禪師

河中府懷則禪師

潞府青蓮元禮禪師

鄂州洪潭禪師

河中府保慶禪師

象原懷坦禪師

大興山道昭禪師

甘泉志賢禪師

京兆咸通寺覺禪師

路府法柔禪師

洪州開元寺玄莊禪師

義興務辯禪師

已上二十三人無

機緣語句不錄

海陵慶雲禪師

懷讓禪師第一世

江西道一禪師，漢州什邡人也。姓馬氏，容貌奇異，牛行虎視，引舌過鼻，足下有二輪文。幼歲，依資州唐和尚落髮，受具於渝州圓律師。唐開元中，習禪定於衡嶽，傳法院遇讓和尚，同參九人，唯師密受心印。思之遷也，同源而異派，故禪法之盛，以二師劉、荷爲無知矣。西天般若多羅記達磨云：震旦雖闊，無別路。真如假姪孫，脚下行。金雞解銜一顆米，供養十方羅漢。僧又六祖能和尚謂讓曰：向後佛法從汝邊去。出馬駒蹄殺天下人。厥後江西法嗣布於天下。時號馬祖。始自建陽，佛迹嶺遷至臨川，次至南康，龔公山大禪中，諱名於開元精舍。時連師路嗣恭聆風景，慕親

受宗旨，由是四方學者雲集。座下一日，謂衆曰：汝等諸人各信自心，是佛。此心即是佛心，達磨大師從南天竺國來，躬至中華，傳上乘一心之法，令汝等開悟。又引楞伽經文，以印衆生心地，恐汝顛倒，不自信此心之法，各各有之。故楞伽經云：佛語心爲宗，無門爲法門。又云：夫求法者，應無所求，心外無別佛。佛外無別心，不取善，不捨惡，淨穢兩邊俱不依怙，達罪性空，念念不可得，無自性，故三界唯心，森羅萬象，一法之所印。凡所見色，皆是見心，心不自心，因色故有心。汝但隨時言說，卽事卽理，都無所礙。菩提道果，亦復

如是於心所生即名為色知色空故生即不生若了此心乃可隨時著衣喫飯長養聖胎任運過時更有何事汝受吾教聽吾偈曰

心地隨時說

菩提亦只寧

事理俱無礙

當生即不生

僧問和尚為什麼說即心即佛師云為止小兒啼僧云啼止時如何師云非心非佛僧云除此二種人來如何指未師云向伊道不是物僧云忽遇其中人來時如何師云且教伊體會大道僧問如何是西來意師云即今是什麼意龐居士問如水無筋骨能勝萬

斛舟此理如何師云這裏無水亦無舟說什麼筋骨一日師上堂良久百丈收卻面前席師便下堂百丈問如何是佛法旨趣師云正是汝放身命處師問百丈汝以何法示人百丈豎起拂子師云只這箇為當別有百丈拋下拂子僧問如何得合道師云我早不合道僧問如何是西來意師便打乃云我若不打汝諸方笑我也有小師行腳迴於師前畫箇圓相就上禮拜了立師云汝莫欲作佛否云某甲不解捏目師云吾不如汝小師不對鄧隱峯辭師云什麼處去對云石頭去師云石頭路滑對云竿木隨身逢場作

戲便去纔到石頭卽繞禪牀一匝振錫一聲問是何
宗旨石頭云蒼天蒼天隱峯無語卻迴舉似於師師
云汝更去見他道蒼天汝便噓噓隱峯又去石頭一
依前問是何宗旨石頭乃噓噓隱峯又無語歸來師
云向汝道石頭路滑有僧於師前作四畫上一長下
三短問云不得道一長三短離此四字外請和尚答
師乃畫地一畫云不得道長短答汝了也忠國師聞
問老有一講僧來問云未審禪宗傳持何法師卻問
云座主傳持何法彼云忝講得經論二十餘本師云
莫是師子兒否云不敢師作噓噓聲彼云此是法師

云是什麼法云師子出窟法師乃默然彼云此亦是
法師云是什麼法云師子在窟法師云不出不入是
什麼法無對百丈代遂辭出門師召云座主彼卽迴
首師云是什麼亦無對師云這鈍根阿師洪州廉使
問云弟子喫酒肉卽是不喫卽是師云若喫是中丞
祿不喫是中丞福師入室弟子一百三十九人各爲
一方宗主轉化無窮師於貞元四年正月中登建昌
石門山於林中經行見洞壑平坦處謂侍者曰吾之
朽質當於來月歸茲地矣言訖而迴至二月四日果
有微疾沐浴訖跏趺入滅元和中追諡大寂禪師塔

曰大莊嚴今海昏縣影堂存焉

高僧傳云大覺禪師

懷讓禪師第二世馬祖法嗣

越州大珠慧海禪師者建州人也姓朱氏依越州大雲寺道智和尚受業初至江西參馬祖祖問曰從何處來曰越州大雲寺來祖曰來此擬須何事曰來求佛法祖曰自家寶藏不顧拋家散走作什麼我這裏一物也無求什麼佛法師遂禮拜問曰阿那箇是慧海自家寶藏祖曰即今問我者是汝寶藏一切具足更無欠少使用自在何假向外求覓師於言下自識本心不由知覺踊躍禮謝師事六載後以受業師年

老遽歸奉養乃晦迹藏用外示凝訥自撰頓悟入道

要門論一卷被法門師姪玄晏竊出江外呈馬祖祖

覽訖告衆云越州有大珠圓明光透自在無遮障處

也衆中有知師姓朱者迭相推識結契來越上尋訪

依附

時號大珠和尚者因馬祖示出也

師謂曰祖客我不會禪竝無

一法可示於人故不勞汝久立且自歇去時學侶漸

多日夜叩激事不得已隨問隨答其辯無礙

廣語出別卷

時有法師數人來謁曰擬伸一問師還對否師曰深

潭月影任意撒摩問如何是佛師曰清潭對面非佛

而誰衆皆茫然

法眼云是即沒交涉

良久其僧又問師說何法

度人師曰貧道未曾有一法度人曰禪師家渾如此
師卻問曰大德說何法度人曰講金剛般若經師曰
講幾座來曰二十餘座師曰此經是阿誰說僧抗聲
曰禪師相弄豈不知是佛說耶師曰若言如來有所
說法則爲謗佛是人不解我所說義若言此經不是
佛說則是謗經請大德說看無對師少頃又問經云
若以色見我以音聲求我是人行邪道不能見如來
大德且道阿那箇是如來曰某甲到此卻迷去師曰
從來未悟說什麼卻迷僧曰請禪師爲說師曰大德
講經二十餘座卻未識如來其僧再禮拜願垂開示

師曰如來者是諸法如義何得忘卻曰是是諸法如
義師曰大德是亦未是曰經文分明那得未是師曰
大德如否曰如師曰木石如否曰如師曰大德如同
木石如否曰無二師曰大德與木石何別僧無對良
久卻問如何得大涅槃師曰不造生死業對曰如何
是生死業師曰求大涅槃是生死業捨垢取淨是生
死業有得有證是生死業不脫對治門是生死業曰
云何卽得解脫師曰本自無縛不用求解直用直行
是無等等僧曰如禪師和尚者實謂希有禮謝而去
有行者問卽心卽佛那箇是佛師云汝疑那箇不是

佛指出看無對師云達則徧境是不悟永乖踈有律
師法明謂師曰禪師家多落空師曰卻座主家多
落空法明大驚曰何得落空師曰經論是紙墨文字
紙墨文字者俱空設於聲上建立名句等法無非是
空座主執滯教體豈不落空法明曰禪師落空否師
曰不落空曰何卻不落空師曰文字等皆從智慧而
生大用現前那得落空法明曰故知一法不達不名
悉達師曰律師不唯落空兼乃錯用名言法明作色
問曰何處是錯師曰律師未辨華竺之音如何講說
曰請禪師指出法明錯處師曰豈不知悉達是梵語

耶律師雖省過而心猶憤然具梵語薩婆易翻化
舊云悉達多猶是訛略梵語也又問曰夫經律論是佛語讀誦依教
奉行何故不見性師曰如狂狗趁塊師子蔽人經律
論是自性用讀誦者是性法法明曰阿彌陀佛有父
母及姓否師曰阿彌陀姓憍尸迦父名月上母名殊
勝妙顏曰出何教文師曰出陀羅尼集法明禮謝讚
歎而退有三藏法師問真如有變易否師曰有變易
三藏曰禪師錯也師卻問三藏有真如否曰有師曰
若無變易決定是凡僧也豈不聞善知識者能迴三
毒為三聚淨戒迴六識為六神通迴煩惱作菩提迴

無明爲大智真如若無變易三藏真是自然外道也
三藏曰若爾者真如卽有變易師曰若執真如有變
易亦是外道曰禪師適來說真如有變易如今又道
不變易如何卽是的當師曰若了了見性者如摩尼
珠現色說變亦得說不變亦得若不見性人聞說真
如變便作變解聞說不變便作不變解三藏曰故知
南宗實不可測有道流問世間有法過自然否師曰
有曰何法過得師曰能知自然者曰元氣是道否師
曰元氣自元氣道自道曰若如是者則應有二師曰
知無兩人又問云何爲邪云何爲正師曰心逐物爲

邪物從心爲正有源律師來問和尚修道還用功否
師曰用功曰如何用功師曰饑來喫飯困來卽眠曰
一切人總如是同師用功否師曰不同曰何故不同
師曰他喫飯時不肯喫飯百種須索睡時不肯睡千
般計校所以不同也律師杜口有韞光大德問禪師
自知生處否師曰未曾死何用論生知生卽是無生
法無離生法說有無生祖師云當生卽不生曰不見
性人亦得如此否師曰自不見性不是無性何以故
見卽是性無性不能見識卽是性故名識性了卽是
性喚作了性能生萬法喚作法性亦名法身馬鳴祖

師云所言法者謂衆生心若心生故一切法生若心無生法無從生亦無名字迷人不知法身無象應物現形遂喚青青翠竹總是法身鬱鬱黃華無非般若黃華若是般若般若即同無情翠竹若是法身法身即同草木如人喫筍應總喫法身也如此之言寧堪齒錄對面迷佛長劫希求全體法中迷而外覓是以解道者行住坐臥無非是道悟法者縱橫自在無非是法大德又問太虛能生靈智否真心緣於善惡否貪欲人是道否執是執非人向後心通否觸境生心人有定否住寂寞人有慧否懷傲物人有我不執

執有人有智否尋文取證人苦行求佛人離心求佛人執心是佛人此智稱道否請禪師一一爲說師曰太虛不生靈智真心不緣善惡嗜欲深者機淺是非交爭者未通觸境生心者少定寂寞忘機者慧沈傲物高心者我壯執空執有者皆愚尋文取證者益滯苦行求佛者俱迷離心求佛者外道執心是佛者爲魔大德曰若如是應畢竟無所有師曰畢竟是大德不是畢竟無所有大德踴躍禮謝而去

洪州百丈山惟政禪師一日謂衆曰你爲我開由我爲汝說大義僧衆開由竟師晚間上堂僧問開由已

竟請師說大義師下禪牀行三步展手兩畔以目視
天地云大義田卽今存矣有老宿見日影透窻問師
曰爲復窻就日日就窻師曰長老房內有客歸去好
師問南泉曰諸方善知識還有不說似人底法也無
南泉曰有師曰作麼生是不說似人底法泉云不是
心不是佛不是物師曰恁麼則說似人了也曰某甲
卽恁麼師曰師伯作麼生曰我又不是善知識爭知
有說不說底法師曰某甲不會請師伯說曰我太殺
爲汝說了也僧問如何是佛佛道齊師曰定也師因
入京路逢官人命喫飯忽見驢鳴官人召云頭陀師

舉頭官人卻指驢師卻指官人

法眼別云
但作驢鳴

洪州泐潭法會禪師問馬祖如何是西來祖師意祖
曰低聲近前來師便近前祖打一擗云六耳不同謀
來曰來師至來曰猶入法堂云請和尚道祖云且去
待老漢上堂時出來與汝證明師乃悟云謝大衆證
明乃繞法堂一匝便去

池州杉山智堅禪師初與歸宗南泉行腳時路逢一
席各從席邊過了南泉問歸宗云適來見席似箇什
麼宗云似箇猫兒宗卻問師師云似箇狗子宗又問
南泉泉云我見是箇大蟲師喫飯次南泉收生飯云

生師云無生南泉云無生猶是末南泉行數步師召云長老長老南泉迴頭云怎麼師云莫道是末一日普請擇蔬菜南泉拈起一莖云這箇大好供養師云非但這箇百味珍羞他亦不顧南泉云雖然如此箇箇須管他始得女覺云是相見語僧問如何是本來身師云舉世無相似

洪州泐潭惟建禪師一日在馬祖法堂後坐禪祖見乃吹師耳兩吹師起定見是和尚卻復入定祖歸方丈令侍者持一椀茶與師師不顧便自歸堂
澧州茗谿道行禪師師有時云吾有大病非世所醫

後有僧問先曹山承古人有言吾有大病非世所醫未審喚作什麼病曹云攢簇不得底病云一切眾生還有此病也無曹云人人盡有云人人盡有和尚還有此病也無曹云正覺起處不得云一切眾生爲什麼不病曹云眾生若病卽非眾生云未審諸佛還有此病也無曹云有云既有爲什麼不病曹云爲伊惺惺僧問如何修行師云好箇阿師莫客作僧云畢竟如何師云安置卽不堪又僧問如何是正修行路師云涅槃後有僧云如何是涅槃後有師云不洗面僧云學人不曾師云無面得洗

撫州石鰲慧藏禪師本以弋獵為務惡見沙門因逐
羣鹿從馬祖庵前過祖乃迎之藏問和尚見鹿過否
祖曰汝是何人曰獵者祖曰汝解射否曰解射祖曰
汝一箭射幾箇曰一箭射一箇祖曰汝不解射曰和
尚解射否祖曰解射曰和尚一箭射幾箇祖曰一箭
射一羣曰彼此是命何用射他一羣祖曰汝既知如
是何不自射曰若教某甲自射即無下手處祖曰這
漢曠劫無明煩惱今日頓息藏當時毀棄弓箭自以
刀截髮投祖出家一日在廚作務次祖問曰作什麼
曰牧牛祖曰作麼生牧曰一迴入草去便把鼻孔拽

來祖曰子真牧牛師便休師住後常以弓箭接機如
平和尚師問西堂汝還解捉得虚空麼西堂云捉得
師云作麼生捉堂以手撮虚空師云作麼生恁麼捉
虚空堂卻問師先作麼生捉師把西堂鼻孔拽西堂
作忍痛聲云大殺拽人鼻孔直得脫去師云直須恁
麼捉虚空始得衆僧參次師云適來底什麼處去也
有僧云在師云在什麼處其僧彈指一聲僧到禮拜
師云還將那箇來否僧云將得來師云在什麼處僧
彈指三聲問如何免得生死師云用免作什麼僧云
如何免得師云這底不死死

唐州紫玉山道通祖師者廬江人也姓何氏幼隨父
守官泉州南安縣因而出家唐天寶初馬祖闡化建
陽居佛迹巖師往謁之尋遷於南康龔公山師亦隨
之貞元四年二月初馬祖將歸寂謂師曰夫玉石潤
山秀麗益汝道業遇可居之師不曉其言是秋與伏
牛山自在禪師同遊洛陽迺至唐州西見一山四面
懸絕峯巒秀異因詢鄉人云是紫玉山師乃陟山頂
見有石方正瑩然紫色歎曰此其紫玉也始念先師
之言乃懸記耳遂翦茆構舍而居焉後學徒四集僧
問如何出得三界師云汝在裏許得多少時也僧云

如何出離師云青山不礙白雲飛于頃相公問如何
是黑風吹其船舫漂墮羅刹鬼國師云于頃客作漢
問恁麼事恁麼于公失色師乃指云這箇便是漂墮
羅刹鬼國于公又問如何是佛師喚于頃頃應諾師
云更莫別求有僧舉似藥山藥山云縛殺這漢也僧
藥山云云和尚如何藥山亦喚云某甲僧應諾
是什麼元和八年弟子金藏參百丈迴禮觀師云汝
其來矣此山有主也於是囑付金藏訖策杖徑去襄
州道俗迎之至七月十五日無疾而終壽八十有三
江西北蘭讓禪師湖塘亮長老問伏承師兄畫得先
師真暫請瞻禮師以兩手擎窗開示之亮便禮拜師

云莫禮莫禮亮云師兄錯也某甲不禮師兄師云汝
禮先師真亮云因什麼教某甲莫禮師云何會錯
洛京佛光如滿禪師曾住五臺山金閣寺唐順宗問佛從何方
來滅向何方去既言常住世佛今在何處師答曰佛
從無爲來滅向無爲去法身等虚空常在無心處有
念歸無念有住歸無住來爲衆生來去爲衆生去清
淨真如海湛然體常住智者善思惟更勿生疑慮帝
又問佛向王宮生滅向雙林滅住世四十九又言無
法說山河及大海天地及日月時至皆歸盡誰言不
生滅疑情猶若斯智者善分別師答曰佛體本無爲

迷情妄分別法身等虚空未曾有生滅有緣佛出世
無緣佛入滅處處化衆生猶如水中月非常亦非斷
非生亦非滅生亦未曾生滅亦未曾滅了見無心處
自然無法說帝聞大悅益重禪宗

袁州南源道明禪師上堂云快馬一鞭快人一言有
事何不出頭來無事各自珍重便下堂有僧問一言
作麼生師乃吐舌云待我有廣長舌相卽向汝道洞
山來參方上法堂師云已相看了也洞山便下去至
明日卻上問云昨日已蒙和尚慈悲不知什麼處是
與某甲已相看處師云心心無間斷流入於性海洞

山云幾放過洞山辭去師云多學佛法廣作利益洞
山云多學佛法卽不問如何是廣作利益師云一物
莫違卽是僧問如何是佛師云不可道你是也
沂州鄆村自滿禪師上堂云古今不異法爾如然更
復何也雖然如此這箇事大有人罔措在時有僧問
不落古今請師直道師云情知汝罔措僧欲進語師
云將謂老僧落伊古今僧云如何卽是師云魚騰碧
漢階級難飛僧云如何卽得免茲過咎師云若是龍
形誰論高下其僧禮拜師云苦哉屈哉誰人似我師
一日謂衆曰除卻日明夜暗更說什麼卽得珍重時

有僧問如何是無諍之句師云喧天動地
朗州中邑洪恩禪師仰山初領新戒到謝戒師見來
於禪牀上拍手云和和仰山卽東邊立又西邊立又
於中心立然後謝戒了卻退後立師云什麼處得此
三昧仰云於曹谿脫印子學來師云汝道曹谿用此
三昧接什麼人仰云接一宿覺用此三昧仰云和尚
什麼處得此三昧來師云某申於馬大師處學此三
昧問如何得見性師云譬如屋屋有六窓內有一
獼猴東邊喚山山山應如是六窓俱喚俱應仰山
禮謝起云所蒙和尚譬喻無不了知更有一事只如

內彌猴困睡外彌猴欲與相見如何師下繩牀執仰
 山手作舞云山山與汝相見了譬如螭螟蟲在蚊子
 眼睫上作窠向十字街頭叫喚云土曠人稀相逢者
 少雲居錫云中邑當時若不得仰山這一句語何處
 定不得只是箇弄精竟脚手佛性義在什麼處玄
 覺云若不_{得見中邑且道什麼處是仰山}
 得見中邑處

洪州百丈山懷海禪師者福州長樂人也少歲離家
 三學諳練屬大寂闡化南康乃傾心依附與西堂智
 藏南泉普願同號入室時三大士為角立焉一夕三
 士隨侍馬祖翫月次祖曰正恁麼時如何西堂云正

好供養師云正好修持南泉拂袖便去祖云經入藏
 禪歸海唯有普願獨超物外馬祖上堂大眾雲集方
 陞座良久師乃卷卻面前禮拜席祖便下堂師再參
 馬祖祖見師來取禪牀角頭拂子豎起師云即此用
 離此用祖掛拂子於舊處師良久祖云你已後開兩
 片皮將何為人師遂取拂子豎起祖云即此用離此
 用師掛拂子於舊處祖便喝師直得三百耳聾自此
 雷音將震檀信請於洪州新吳東住大雄山以居處
 巖巒峻極故號之百丈既處之未朞月參玄之賓四
 方麈至即有為山黃蘗當其首一日師謂眾曰佛法

不是小事老僧昔再參馬祖被大師一喝直得三日
耳聾眼暗時黃蘗聞舉不覺吐舌師曰子已後莫承
嗣馬祖去葉云不然今日因師舉得見馬祖大機之
用然且不識馬祖若嗣馬祖已後喪我兒孫師云如
是如是見與師齊滅師半德見過於師方堪傳授子
甚有超師之作一日有僧哭入法堂來師曰作麼曰
父母俱喪請師選日師云明白來一時埋卻師上堂
云併卻咽喉唇吻速道將來瀉山云某甲不道請和
尚道師云不辭與汝道久後喪我兒孫五峯云和尚
亦須併卻師云無人處斫額望汝雲巖云某甲有道

處請和尚舉師云併卻咽喉唇吻速道將來雲巖曰
師今有也師曰喪我兒孫師謂衆曰我要一人傳語
西堂阿誰去得五峯云某甲去得師云汝作麼生傳
語五峯云待見西堂即道師云道什麼五峯云卻來
說似和尚師與瀉山作務次師問有火也無瀉山云
有師云在什麼處瀉山把一枝木吹三兩氣過與師
師云如蟲餌木問如何是佛師云汝是阿誰僧云某
甲師云汝識某甲否僧云分明箇師乃舉起拂子云
汝還見麼僧云見師乃不語因普請鑿地次忽有一
僧聞飯鼓鳴與起鑿頭大笑便歸師云俊哉此是觀

音入理之門師歸院乃喚其僧問適來見什麼道理
便恁麼對云適來只聞鼓聲動歸喫飯去來師乃笑
問依經解義三世佛怨離經一字如同魔說如何師
云固守動靜三世佛怨此外別求即同魔說因僧問
西堂云有問有答不問不答時如何西堂云怕爛卻
作麼師聞舉乃云從來疑這箇老兄僧云請和尚道
師云一合相不可得師謂衆云有一人長不喫飯不
道饑有一人終日喫飯不道飽衆皆無對雲巖問和
尚每由驅驅爲阿誰師云有一人要巖云因什麼不
教伊自作師云他無家活僧問如何是大乘頓悟法

門師曰汝等先歇諸緣休息萬事善與不善世出世
間一切諸法莫記憶莫緣念放捨身心令其自在心
如木石無所辨別心無所行心地若空慧自自現如
雲開日出相似俱歇一切攀緣貪瞋愛取垢淨情盡
對五欲八風不被見聞覺知所縛不被諸境所惑自
然具足神通妙用是解脫人對一切境心無靜亂不
攝不散透一切聲色無有滯礙名爲道人但不被一
切善惡垢淨有爲世間福智拘繫名爲佛慧是非
好醜是理非理諸知見總盡不被繫縛處心自在名
初發心菩薩便登佛地一切諸法本不自空不自言

色亦不言是非垢淨亦無心繫縛人但人自虛妄計
著作若干種解起若干種知見若垢淨心盡不住繫
縛不住解脫無一切有爲無爲解平等心量處於生
死其心自在畢竟不與虛幻塵勞纏界生死諸入和
合迥然無寄一切不拘去留無礙往來生死如門開
相似若遇種種苦樂不稱意事心無退屈不念名聞
衣食不貪一切功德利益不爲世法之所滯心雖親
受苦樂不于于懷羸食接命補衣禦寒暑兀兀如愚
如聾相似稍有親分於生死中廣學知解求福求智
於理無益卻被解境風漂卻歸生死海裏佛是無求

人求之卽乖理是無求理求之卽失若取於無求復
同於有求此法無實無虛若能一生心如木石相似
不爲陰界五欲八風之所漂溺卽生死因斷去住自
由不爲一切有爲因果所縛他時還與無縛身同利
物以無縛心應一切心以無縛慧解一切縛亦能應
病與藥僧問如今受戒身口清淨已具諸善得解脫
否答少分解脫未得心解脫未得一切解脫問云何
是心解脫答不求佛不求知解垢淨情盡亦不守此
無求爲是亦不住盡處亦不畏地獄縛不愛天堂樂
一切法不拘如名爲解脫無礙卽身心及一切皆名

解脫汝莫言有少分戒善將爲便了有恒沙無漏戒
定慧門都未涉一毫在努力猛作早與莫待耳聾眼
暗頭白面皺老苦及身眼中流淚心中悵惶未有去
處到恁麼時整理脚手不得也縱有福智多聞都不
相救爲心眼未開唯緣念諸境不知返照復不見佛
道一生所有惡業悉現於前或忻或怖六道五蘊現
前盡見嚴好舍宅舟船車輦光明顯赫爲縱自心貪
愛所見悉變爲好境隨所見重處受生都無自由分
龍畜良賤亦總未定問如何得自由答如今對五欲
八風情無取捨垢淨俱亡如日月在空不緣而照心

如木石亦如香象截流而過更無疑滯此人天堂地
獄所不能攝也又如讀經看教語言皆須宛轉歸就
自己但是一切言教只明如今覺性自己俱不被一
切有無諸法境轉是導師能照破一切有無境法是
金剛卽有自由獨立分若不能恁麼得縱令誦得十
二韋陀經只成增上慢卻是誦佛不是修行讀經看
教若准世間是好善事若向明理人邊數此是壅塞
人十地之人脫不去流入生死河但不用求覓知解
語義句知解屬貪貪變成病只如今但離一切有無
諸法透過三句外自然與佛無差既自是佛何慮佛

此經
之
序

不解語只恐不是佛被有無諸法轉不得自由是以
理未立先有福智載去如賤使貴不如於理先立後
有福智臨時作得捉土為金變海水為酥酪破須彌
山為微塵於一義作無量義於無量義作一義師有
時說法竟大眾下堂乃召之大眾迴首師云是什麼
藥山目之為唐元和九年正月十七日歸寂壽九十
五長慶元年敕謚大智禪師塔曰大寶勝輪
禪門規式

百丈大智禪師以禪宗肇自少室至曹谿以來多居
律寺雖別院然於說法住持未合規度故常爾介懷

乃曰祖之道欲誕布化元冀來際不泯者豈當與諸
事同笈摩教為隨行耶舊梵語阿含新云阿或曰瑜
笈摩即小乘教也
伽論瓔珞經是大乘戒律胡不依隨哉師曰吾所宗
非局大小乘非異大小乘當博約折中設於制範務
其宜也於是創意別立禪居凡具道眼有可尊之德
者號曰長老如西域道高臘長呼須菩提等之謂也
既為化主即處于方丈同淨名之室非私寢之室也
不立佛殿唯樹法堂者表佛祖親囑受當代為尊也
所冀學眾無多少無高下盡入僧中依夏次安排設
長連牀施拋架掛搭道具臥必斜枕牀廣右脅吉祥

睡者以其坐禪既久略偃息而已具四威儀也除入室請益任學者勤怠或上或下不拘常准其闔院大眾朝參夕聚長老上堂陞堂主事徒衆鴈立側聆賓主問酬激揚宗要者示依法而住也齋粥隨宜二時均徧者務于節儉表法食雙運也行普請法上下均力也置十務謂之寮舍每用首領一人管多人營事令各司其局也王飯者且為飯頭主菜者且為菜頭他皆倣此或有假號竊形混于清衆并別致喧撓之事即當維那檢舉抽下本位掛搭擯令出院者貴安清衆也或彼有所犯即以拄杖杖之集衆燒衣鉢道具遣逐從偏門而出者

示恥辱也詳此一條制有四益一不汚清衆生恭信故三業不善不可共住二不毀僧形循佛制故隨宜懲罰得罰三不擾公門省獄訟故四不洩于外護宗綱故四來同居聖凡孰辨且如來未嘗得全無但見一僧有過便雷例譏誚誅不知以輕衆法其損甚大今禪門若稍無妨害者宜依百丈叢林格式量事區分且立法防姦不為賢上然黨可有格而無犯不可有犯而無教惟百丈禪師護法之益其禪門獨行由百丈之始今略敘大要徧示後代學者令不忘本也其諸軌度山門備焉

景德傳燈錄卷第六

音釋

